

Die Antwort vo ihr

Lieber Hans
grod bini allaans
und hob dei Zeiln glesn
is des wirkli so gwesn
ich hob alles vergessn
und überhaupt
sowos tutma net schreim
des läßtma schö bleim

wenn des Briefla in fremda Fingä wär grotn
ich schämatmi ja in Grund und Bodn
drum schreibma gleich widdä
daß kaans wos waaß
die Angst machtmi siedhaaß
und spinn nix dazu
du bringstmi ja sunst um mei Ruh

Na Hans
loß des Schreim liebä bleim
des is mir za gefährli
ehrli
wos könnt alles passiern
wenn du mei Büstnhalterla
am End tätst verliern

drum kummi zu dir
mornng nocht
um halb ocht
on der hintern Tür

schö wärs
wenn kaans wär daham
und wir zwaa allaans treffatn zam
ich nimm mei Zeuch
verschwind gleich
und loßmi auf gor nix mehr ei
du du
du mit deiner elendn Schmeichlerei
obä ich bleib dir scho treu
und wie ich mich freu
auf mornng nocht um halb ocht
du Schlangangala mei

dei K.